

L' andoman matin andero
 A senti messa vers mesdi,
 E tampi nè manch a l'ero
 Ancor tuit mes ancuti.
 A ventava ampò sentie
 Zonzonè tut longh dla strà,
 A smiavo propi un bus d'avie,
 O un vespe ant 'l bon dl'istà.
 A buchè ste maravie,
 Tuit e tute a son corù,
 Prchè cose pi da rie
 Gnun j'avia mai vedù.

Dialogo tra Madre e Figlia,
 che vuol maritarsi.

CANZONE XLIX.

Mare mare, deme ardris,
 Vedve nen com' i patis,
 Feme ampò nen stantè,
 Ch' i peus pa pi nen spetè,
 Deme prest, feme 'l piasi,
 Quaich bel giovo pr mari.
 Cosa sonne ste rason,
 Distu an burla o pr da bon?
 Veusto ampò ch' i daga man
 Al toiror o foat dij can?
 I t' fas pro sicurament
 Passè 'l veso ant un moment.
 Che cheur dur, che crudeltà!
 Vedve nen ch' j' eu già l' età?
 Aine sempre da fè l' stras
 Ant sta cà a serne ij spinas?
 A m' par ch' a l' è giunai
 Temp d' surti da cousti guai.

Oh che pressa, oh che vision!

T'as pa gnanca ancor ij spron;

I t'ses pa ancor bonna a fè

Una mnestra da vachè.

Veusto meinagè 'l cassul

Con la greuja ancor al cul?

Da si un meis e dontrè di

J'eu peui quindes agn cumpi,

E volive gnanch ancor

Ch' i comensa fè l'amor?

Ai n'è tante, mi lo sai,

Sposà giovo com' un ai.

Cosa tenstu ancor ciancià,

Bruta lenga da stropià?

Fin ades t'as mai vojù

Aplichete a la virtù;

T'ses pa ancora erba, nè fen,

E pr ditla, bonna a nen.

E volive, an conclusion,

Vedme dè an disperassion?

Cosa peui n'avrive mai

S' i m' vedri fè j' ultim bai

Pr dèsgust e pr dolor?

V'acquistè pro bel onor.

Va marlait, s' i t'as tant front,

Da to pare a dene cont,

Quand a sapia 'l schiribis

Ch' a l'è sautate ant 'l cupis,

A t'farà forse cambiè

Coul umor e coul pensè.

Pr me pare l'è pa cativ,

I lo seu pr positiv;

Pur ch' i m'preste voi la man,

E ch' i bute 'l vostr gran,

L'è sigur ch' a dis pa d'no,

E mi dlongh i lo sai d'co.

Quand to pare lo savrà,
 Oh che d' gnogne ch' a t' farà!
 I t' as pa ancor conossù.
 Nè provà l' umor borù
 Ch' a l' ha quand ariva 'l cas,
 Ch' 'l fumat ai sauta al nas.
 Sta rason mojà ant 'l lait
 A m' sbarua nen afait,
 I seu bin 'l cheur ch' a l' ha,
 Ch' a l' è tener com' 'na quajà,
 E ch' a l' è così bon fioul,
 Ch' un lo vira com' un veul.
 Chi elo coul ch' a l' è stait tant lest
 Pr robete 'l cheur si prest?
 Gnun l' ha mai ancor vedù
 Nessun giovo ch' a sia vnu
 Si pr cà a fete l' amor,
 E passè pr to sfojor.
 Quand i sapie coul ch' a l' è,
 Forse voi v' apasijrè;
 A l' è un bel garson bin nà,
 Spiritos e desgagià,
 E d' una famia tal,
 Ch' a s' peul nen parlesne mal.
 S' a fuss bin 'l fioul del Re,
 Ti t' ses nen da maridè;
 T' as pa ancora un pluch d' fardel,
 Cosa menstu 'l bertavel?
 Va amparè a filè e cusi
 Dnans mariete, e tasmè li.
 A m' par bin ch' i lo savi,
 Ch' a son rair i bon parti,
 E ch' a venta pieje al vol
 Pr nen rompse d' vote 'l col,
 Piand quaich lord o patanù,
 Ch' a l' abia nen ch' i dent e 'l mnù.

A dsades, ten bin da ment,
 Ch' i t' arfilo un sgiaf sui dent,
 Tirme via d' ant i pè
 Senza fetlo replichè,
 E con to bel umorat
 Ven pi nen a rompime i garat.
 Voi i veule ancora fè
 Ch' 'l mond parla del fait me;
 I m' fari piè pr da bon
 Una tal arsolussion,
 Ch' an farà forse penti
 Tute e doe, voi e mi.
 T' as fait bin, e santament,
 A descurvì to sentiment,
 I t' as dame la lession
 Pr buteme an atension
 A desblete i to disegn,
 Lassa pur a mi l' impegn.
 Pieve ampò nen tant ambreui,
 Ch' i savreu fevla su j' eui.
 Marcandeme pur di e neuit,
 Tant i savrai bin deme deuit,
 E feve restè, an tal cas.
 Con na branca e mesa d' nas.
 Ades si ch' i vedo bin,
 Ch' i t' ses lorda o pienna d' vin;
 Fa una cosa, va a durmi
 Fin ch' i t' l' abie digeri.
 Tramantchè, forse doman.
 To servel a sarà pi san.